

BiH Parlament usvojio zakon o slobodi pristupa informaciji - Osvajanje novog terena u Jugoistočnoj Evropi

Sarajevo, 24. oktobra 2000 – OHR i Misija OSCE-a u BiH pozdravljaju usvajanje akta o slobodi pristupa informaciji od strane Parlamentarne Skupštine BiH. Zakon, koji su podnijeli Sejfudin Tokić i Ivo Lozančić, usvojen je jučer, ponedjeljak 23. oktobra, od strane Doma naroda. Predstavnički dom usvojio je zakon u srijedu 18. oktobra.

“Parlamentarna Skupština preduzela je uistinu važan korak i time signalizirala da ozbiljno shvata pravo građana u očekivanju odgovornosti i transparentnosti u vladanju. Ovaj Parlament je prvi na području bivše Jugoslavije koji je usvojio ovakvo zakonodavstvo” rekao je Šef Misije OSCE-a Ambasador Robert L. Barry. “Građanima ove zemlje dato je moćno oružje – zakonsko pravo da zahtijevaju informacije od vlade – i ja se samo mogu nadati da će ga oni i koristiti.”

Po ovom aktu, svaki građanin ima pravo pristupa informaciji koju ima vlada i ostala javna tijela. Ovaj akt podrazumjeva da je pristup informaciji pravilo, a da je uskraćivanje pristupa izuzetak i od vlade se zahtijeva da obezbijedi što je moguće više informacija uz najmanju moguću cijenu.

Kao važan korak naprijed u promovisanju veće otvorenosti vlade, ovaj akt će otvoriti već dugo zatvorena vrata i ograničiti osnove po kojima se informacija može uskratiti. Rezultat ovog akta biti će informisanija javna rasprava o politici, veća preglednost djelovanja i odluka vladinih tijela i više prilika za javnost da zahtijeva informacije koje su prethodno bile dostupne samo vladi.

Nacrt akta uradio je OSCE uz smjerice OHR-a i široku pomoć domaćih i međunarodnih pravnih stručnjaka. Također, ovaj akt je napravljen uz pomoć obimnih javnih rasprava u kojima su učestvovali mnogi sektori društva, uključujući medije, NVO, civilne grupe, pravnike kao i članove lokalne vlasti.